

Premier Eman presente na edificio Cocolishi pa bashamento di ultimo piso



Ayera den oranan di marduga empleadonan di ALBO a basha e ultimo piso di edificio Cocolishi, cu ta bay t'e sede nobo pa Ministernan di Gobierno di Aruba. Mainta tempran Prome Minister Mike Eman a bay mira pa su mes e coronacion di un trabou importante ora cu a yega n'e piso mas halto di e edificio Cocolishi. E mandatario a expresa su satis-

faccion n'e supervisor Egidio Yrausquin y su trahadornan p'e manera eficaz cu e trabounan ta wordo realisa, trabounan cu e mandatario ta sigui tur dia for di Bestuurskantoor. Eman a expresa n'e supervisor, kende a bay scol hunto cune, di por bebe spantenbier dia 1 di september, e fecha cu ambos ta cumpli aña.

E edificio ta bay ta ubicacion di Consejo di Minister y nan staff directo, contrario n'e situacion actual. E oficina den cua Prome Minister ta sinta awor ta bira un oficina protocolario unda cu e Prome Minister di Aruba lo tene reunion y ricibi bishitantenan. E Bestuurskantoor historico tambe lo wordo restaura y lo keda e entrada principal di

gubernacion di Aruba, dunando realce n'e historia politico y gubernamental di Aruba.

Manera ta conoci, n'e parti patras di e edificio nobo ta bay bin un Plaza cu ta wordo dedica na Padu Lampe, co-autor di e himno nacional di Aruba. Den cuadro di esaki, e mandatario a bisa cu el a haci un apelacion n'e arkitectonan pa pone un fontein cu cada ora tin movecion di awa riba ritmo di himno nacional di Aruba.

Di e manera aki, e area tambe lo bira un atraccion pa local y bishitantenan, mientras cu tin varios edificio historico rond. Esaki ta completa un parti importante di e centro di gubernacion di pais Aruba y e centro di orguyo nacional di e hendenan di Aruba.

"E tempo cu nos a plama tur cos for di otro y no tabatin claridad riba e unidad di historia nacional di pais Aruba, nos a perde e

toke ey, y awor cu tur e trabounan aki nos a re-establece e toke eybek di sentimento nacional, di dedicacion y compromiso cu Aruba tin cu e historia di con Aruba a bira baas den su propio cas," Premier Eman a bisa durante su bishita n'e edificio Cocolishi.

E supervisor Egidio Yrausquin a splica cu nan a cuminsa rond di 3'or di madrugada cu bashamento di e piso y pa mas o menos 8'or di mainta e ta cla. Despues di esaki ta bay traha un pida piso riba e superficie cu alabes lo bira e dak di edificio Cocolishi. E trabou di henter e proyecto a avansa basta bon cu por bisa cu nan ta bon riba schedule y inclusive lo por gana tempo trahando cu algo mas di trinta persona.

Entrega di yabi ta tuma lugar rond di fin di september, 2013. E proyectona final lo keda un joya di edificio," e supervisor a duna di conoce.